

«Nire ustez egin dudan liburua lanerako tresna da, eta alde horretatik ongi dago»

Andoni Lekuonak 'Euskal kantagintzaren urrats berri' liburua aurkeztuko du gaur

Pagoarte kultur guneak beste ekitaldi bat hartuko du gaur arratsaldeko 20:00etan. Lehenik, Egan aldizkariaren aurtengo 1. eta 2. zenbakiak aurkeztuko dira. Gero, Andoni Lekuonaren azken liburua aurkeztuko da, eta kontzertu bat emango du bere anaia Juan Mari eta Julen, Antton Valverde eta Imanol Larzabalen laguntzaz.


Amagoia Iban / Donostia

ANDONI LEKUONAK berak ere abestu egingo du gaur, berak jakinarazi duenez, eta, berea kantagintza ez dela uste izan arren, ez omen dago urduri. «Urduri baino gehiago, burua hartua dut aurkezpenerekin, eta hasteko eta ongi amaitzeko gogorekin nago».

Gaur Pagoarten bildutakoek entzun ahal izango dutena ez omen da kantaldi klasiko bat izango. «Lagun artekoa da, eta bakoitzak pieza bat edo bi kantatuko ditu. Euskal kantagintzan urrats berri liburuxkaren aurkezpenera izango da, eta abestu aurretik abesti bakoitzaren argibideak emango ditut, kantuaren hitzari garrantzia emanez batez ere».

Horrenbestez, gaurko kantaldian Juan Mari eta Julen Lekuona anaia, Antton Valverde eta Imanol Larzabal musikariak bildu arren, musikaren babes gutxiarekin abestuko omen dute. «Halako teklatu txiki batekin. Besterik ez. Nik, berriz, ezer gabe abestuko dut. Xumea izango da musika aldetik, baina pentsarazteko eta ikasteko modua izango dela pentsatzen dut», gaineratzen du Andoni Lekuonak.

Aukera sentimental • Kontzertua egin zain, jada prest den bere Euskal kantagintzan urrats berri liburuari buruz mintzo da. «Gogo duenak behintzat bai letrak, bai kantak, ongi ikus ditzake, eta hori da garrantzitsua niretzat. Nire ustez liburua lanerako tresna da, eta alde horretatik ongi dago».



Musika tresnen babesik gabeia ariko dira gaur Pagoarten Andoni, Julen eta Juan Mari Lekuona anaia Imanol Larzabal eta Antton Valverderekin batera. JUAN CARLOS

Liburuxkako hitzaurrean egi-leak berak dioena gogoratzen digu. «Nik Nemesio Etxanizek publikoki hasitako bideari heldu diot». Hau da, modako eta auzo herrietako eta mundu zabaleko kantarik gustukoenak euskaraz ematen eta zabaltzen saiatu da, eta horren adibide dira bere azken liburuan bildutako 28 piezak. «Formula berriak ekarri ditugu, kanpotik ere bai eta pertsonalak ere bai. Musikatutako hainbat poetaren hitzak euskaratu ditugu, eta hori interesgarria dela uste dut. Literatura maite dutenentzat bai behintzat. Hori da egin dugun ekarpen txikia».

Azken 45 urteeta osatu dituen hamaika abestiren arteko aukera bat da liburua. «Aukeratu behar izan ditut. Aukera pertsonala dela esan daiteke. Pixka bat sen-

timentala ere bai. Musika gustukoa dut, eta nire gustuko musikak, gaiak eta autoreak aukeratu ditut. Luis Aragon bat dago, esate baterako, eta niretzat oso sentimentala da, baina nik uste literatura aldetik baduela bere esanahia eta garrantzia. Moustaki bat ere badago, Brel bat ere bai. Brel asko miresten duela erantsi du».

Bere azken liburuan irakurgai partitura eta guzti eman dituen abesti hitzak —«gure kantagintza literaturaren parte bat bezala hartu izan dugu, eta nik musika eta guzti ateratzea eskatu nien Egan-ekoei»— zaletasun hutsagatik etorri dira Lekuonarentzat. Zaletasun horren berri ere eman digu: «Afizioa dudanez, berriz ere gairen bat sortzen bazait, segituko dut egiten, baina ez naiz hartara behartuko, ez dut nire

burua estutuko. Azken batean aukera bat egiten dut, eta aukera da nik neuk gustukoa dudala, letra aldetik edo musika aldetik. Hainbat hobeki biak uztartzen baldin badira». X

Lascaux-Ekain
haitzuloen
inguruko proiektu
bateraturako
bigarren bilera

■ Zestoako Udala eta Dordoinako Kontseilu Orokorra atzo bildu ziren

Erredakzioa / Donostia

ZESTOAKO UDALA eta Dordoinako Kontseilu Orokorra atzo bildu ziren bigarren, eta bertan Lascaux-Ekain: etorkizuneko faksimileak izeneko lankidetzaren proiektuan sakontzen jarraitu zuten, Zestoako Udalak prentsa ohar baten bidez jakinarazi zuenez.

Lankidetzaren proiektu horren barruan aldi bateko erakusketa bat antolatuko da, eta Lascaux zein Ekainen kokatuta dauden guneen antolaketa erabiliko diren berrikuntza teknologikoak azaltzea izango du xede. Erakusketa Akitanian aurkeztuko da datorren urrian, Perigeux-en (Frantzia), eta abenduan Donostiara ekarriko da, Aranzadi Zientzia Elkartera hain zuzen ere. Z. K. Productions enpresak prestatuko du erakusketa, material grafiko eta infografiko, maketa, faksimileak egiteko erabiliko tresnak eta bestelako materiala bilduz.

Zestoako Udalak igorritako prentsa ohar baten arabera, «Udalak Renaud Sanson jaunari (Z. K. Productions) eginaraziko dio Ekaingo haitzuloko margoen eta grabatu paleolitikoen faksimilea». X

aranburu jauregia

TOLOSA

• KOLDOBIKA JAUREGI

"Aithiopes"

(ekainaren 12tik uztailaren 18ra)

Ordutegia: jaietan eta astelehenetan izan ezik, 17:30 - 20:30
Sta. Maria Plaza, 4. Tel.: (943) 674811. Faxe: (943) 672622

'Egan' aldizkariaren '1998-1/2' alea

EUSKALERRIAREN ADISKIDEEN ELKARTEAK argitaratu ohi duen Egan aldizkariaren aurtengo lehen eta bigarren zenbakiak ere aurkeztuko dira gaur Pagoarte gunean. Horretarako, elkarte horretako lehendakari Juan Antonio Garmendia eta idazkari Joxe Mari Urkia Ergoien auzoko kultur gunean izango dira. Baita Egan aldizkariako

zuzendaria bera ere, Luis Mari Mujika.

Egan aldizkariak lau zenbaki atera ohi ditu urtean. Lehen biak ale bat osatzen dute, eta beste hainbeste hirugarren eta laugarrenarekin. Gaur aurkeztuko denak 1998-1/2 azpiztitulua du, eta hor jasotzen dira besteak beste Andoni Lekuonak osatu duen Euskal kantagintzan urrats berri libu-

ruxkaren mamia, Sor-kuntza sailean. Azterketak literarioak sailean, Iñaki Aldekoak idatziriko 'Obabakoak' hamargarren urtemugan (1988-1998) Abangoardiatik Villamediana artikulua; Felipe Juaristiren Miranderen Poesiaz ohar batzuk; Jon Kortazarren Pastoral: Estilo azterketak baterako; Elixabet Urdangarinen Orixeren 'Euskaldunak' poemaren

metrika-azterketa eta Arantza Esnaolaren Luis Mari Mujikaren poesiarren alde formal batzuk daude.

Itzulpenen arloan, Guillermo Etxeberriaren Ciau Masino, Cesare Pavese lana dago. Amaitzeko, Adabakiak sailean Juan San Martinen hainbat artikulua ageri dira, 1997ko liburu zerrenda eta Kritikak eta erreseinak-ekin batera.